



Fonotaga Faaleaoaoga a Taitai i le Lalolagi Atoa Lagolagoina o le Aiga

11 FEPUARI 2006

O LE EKALLESIA A IESU KERISO O LE AU PAIA O
ASO E GATA AI

Lolomi ma faasalalau e
Le Ekalesia a Iesu Keriso o le Au Paia o Aso e Gata Ai
Aai o Sate Leki, Iuta

© 2006 Puletaofia e le Intellectual Reserve, Inc.
Ua taofia aia tatau uma
Lolomi i le Lunaite Setete o Amerika

Faamaonia le faaPeretania: 8/04
Faamaonia le faaliliuga: 8/04

Faasino Mataupu

E Taua le Faaiipoipoga i Lana Fuafuaga Faavavau	2
<i>Elder David A. Bednar</i>	
O Se Tiutetauave Paia e Alofa ma Tausi e Le Tasi le Isi	8
<i>Elder L. Tom Perry</i>	
Ua I Ai i Matua Se Tiute Paia	13
<i>Bonnie D. Parkin</i>	
O Aiga Faalelagi—O Ni Aiga e Faavavau	18
<i>Peresitene Thomas S. Monson</i>	
“O Le Aiga: O Se Folafolaga i le Lalolagi”	24

E Taua le Faaipoipoga i Lana Fuafuaga Faavavau

ELDER DAVID A. BEDNAR

○ Le Korama a Aposetolo e Toasefululua



O Le Tulaga Faavae Taua o le Faaipoipoga

Ua uma ona fautuaina malosi i tatou e le Au Peresitene Sili ina ia tuuina atu a tatou taumafaiga silisili i le faamalolosia o faaipoipoga [ulugalii] ma le aiga. E leai se taimi na sili ona manaomia ai lena aoaoga i le lalolagi, nai lo le taimi nei aua ua osofa'ia le paia o le faaipoipoga, ma ua faaitiitia ai le taua o le aiga.

E ui lava e lagolago e le Ekalesia ma ana polokalama ia le faaipoipoga ma le aiga, ma e masani foi lava ona manuia, ae e tataua ona tatou manatua

i taimi uma le upumoni faavae lenei: e leai se isi mea po o se faalapotopoto e mafai ona suitulaga i le aiga pe faataunuuina ana matafaioi taua.¹ O le mea lea, o le aso o le a muamua ona ou tautala atu ia te outou o ni alii ma ni tamaitai, o tane ma ava, ma o ni tina ma tama, ma le lona lua, o ni taitai perisitua ma ausilali i le Ekalesia. O la'u savali, o le talaonaina lea o le matafaioi taua a le faaipoipoga faavavau i le fuafuaga a lo tatou Tama Faalelagi, mo le fiafia.

O le a tatou taula'i atu i le tulaga faavae taua o le faaipoipoga. Ou te faamoemoe o le toe iloiloaina o a tatou folafolaga faavavau, ma se faamanatu mai pe o ai i tatou ma pe aisea ua tatou o mai ai i lenei olaga faitino, o le a maua ai se taitaiga, se faamafanafanaga, ma se faamoemoega olaola mo i tatou uma, tusa lava pe o a o tatou tulaga faale-faaipoipoga o i ai, po o tulaga faaletagata lava ia i le taimi nei. O le eseese o le tulaga faavae taua o le faaipoipoga ma le tulaga moni o le olaga i aso taitasi, e ono foliga mai i nisi taimi e tele naua, peitai o le a faasolosolo lava ina sili atu ona lelei nai lo le mea ua e iloaina.

Ou te valaau atu ina ia manatua ia fesili nei a o tatou talanoaina ia mataupu faavae e faatatau i le faaipoipoga e faavavau.

Fesili 1: *I lo'u lava olaga, pe o ou taumafai ea e ave ma se tane po o se ava e sili atu [nai lo le mea sa i ai], pe o sauniuni ea ia ave ma se tane po o se ava, e ala lea i le malamalama ma faaaogaina nei mataupu faavae?*

Fesili 2: *I le ave ai o se taitai o le perisitua po o se ausilali, pe o ou fesoasoani ea ia i latou o loo ou tautuaina ina ia malamalama ma faaoga nei mataupu faavae, ma faamalosi ai ia faaipoipoga ma le aiga?*

A o tatou manatunatu ma le loto tatalo i nei fesili ma mafaufau ai ia tatou lava sootaga faale-faaipoipoga ma o tatou tiutetauave i le Ekalesia, ou te tautino atu o le a faamalamalamaina e le Agaga o le Alii o tatou mafaufau, ma aoa o tatou i mea e ao ona tatou faia ma faaleleia (tagai Ioane 14:26).

Aisea e Taua ai le Faaipoipoga

I le "O Le Aiga: O Se Folafolaga i le Lalolagi," ua folafola mai ai e le Au Peresitene Sili ma le Aufono a Aposetolo e Toasefululua "... o le faaipoipoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Le Foafoa mo le taunuuga e faavavau o Lana fanau."² O leni fuaiupu tomua o le folafolaga ua aoa mai ai i tatou e uiga i le tulaga faavae taua o le faaipoipoga ma ua faamamafa mai ai le tulaga aupito taua o le faaipoipoga ma le aiga i le fuafuaga a le Tama. O faaipoipoga amiotonu o se poloaiga,



ma o se laasaga taua i le faagasologa o le foafoaina o sootaga alofa faaleaiga lea e mafai ona faaauau pea i talaatu o le oti.

E lua ni mafuaaga faavae malolosi e fesoasoani ai ia tatou malamalama pe aisea ua taua ai le faaiipooga faavavau i le fuafuaga a le Tama.

Mafuaaga 1: *O natura o le agaga tane ma le fafine e atoa ai ma faatoatoaina e le tasi le isi, ma o le mea foi lea ua faamoemoe ai i alii ma tamaitai ina ia aga'i faatasi atu i luma i le faaeaga.*

O le natura faavavau ma le taua o faaiipooga, e na o totonu lava o le li'o o le siomaga aoao o le fuafuaga a le Tama mo Lana fanau, e mafai ona malamalama ai. O tagata soifua uma—tane ma le fafine—ua foafoaina i le faatusa o le Atua. O i latou taitoatasi o se atalii po o se afafine faaleagaga

faapelepele a ni matua faalelagi

ma, o lea ua tofu ai i latou taitoatasi ma se natura ma se taunuuga paia.”³ O le fuafuaga sili o le fiafia, ua mafai ai e alii ma afafine faaleagaga o le Tama Faalelagi ona maua ni tino faaletino, ma le tomai faalelalolagi latou te maua ai le atoatoaga.

“O le tulaga tane po o le fafine [o le tagata] o se vaega taua lea o le muai olaga, olaga faitino, ma lona faasinomaga ma le faamoemoe e faavavau”⁴ ma i se tulaga aoao, e faamanino ai pe o ai i tatou, pe aisea ua tatou i ai i lenei lalolagi, ma pe o le a foi le mea e ao ona tatou faia ma avea ai. Mo faamoemoega paia, o agaga tane ma le

fafine, e eseese, e tulaga ese, ma e mafai ona tuu-faatasia ma maua ai le atoaga.

Ina ua uma ona foafoaina le lalolagi, sa tuu Atamu i le Faatoaga o Etena. Peitai, o le taua tele, sa fetalai atu ai le Atua “e le lelei pe a mau toatasi le tagata” (Kenese 2:18; Mose 3:18), ma sa avea Eva ma soa ma fesoasoani ia Atamu. Sa manaomia le tuufaatasiga tulaga ese o mana faaleagaga, faaletino, mafaufau, ma lagona o le tane ma le fafine ina ia faataunuuina ai le fuafuaga o le fiafia. E le mafai e le tane na o ia pe na o le fafine foi, ona faataunuu ia faamoemoega na foafoa ai o ia.

O le mamanu paia, ua fuafuaina alii ma tamaitai ina ia aga'i atu faatasi i luma i le faatoatoaga ma se atoaga o le olioli. Ona o o la'ua natura ma mana

tulaga ese, o lea e tofu aumaia ai e tane ma fafine i se sootaga o le faaiipo-poga, ia vaaiga ma aafiaga iloga. E eseese sao o le tane ma le fafine, ae e tutusa lava [o la'ua sao] ina ia tasi ma se faatasiga e leai se isi lava auala e mafai ai. O le tane na te faamae'aina ma faaatoatoa le fafine, o le fafine foi na te faamae'aina ma faaatoatoa le tane, a o la aoao ma faamalosi ma faamanuia e le tasi le isi. “E leai se tane pe a le o i ai le fafine, e leai foi se fafine pe a le o i ai le tane, *i le Alii*” (1 Korinito 11:11; ua faaopoopo le faatusilima).

Mafuaaga 2: *O le mamamu paia, e manaomia ai se tane ma se fafine e aumaia fanau i le lalolagi ma sau-nia se nofoaga sili mo le tausaiaina ma le faafaileleina o le fanau.*

O le poloaiga na tuuina e le Atua ia Atamu ma Eva i le amataga, ia fanafanau ma uluuluola ai le lalolagi, ua faamalosi ma faatumauina i ona po nei. “Ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaiipoipoina faaletulafono, e tatau ona faaaogaina ai. O le ala ua foafoaina ai le ola faitino, [ua] faatuina i le finagalo paia.”⁵ O le mea lea, o le faaiipoipoga i le va o se tane ma se fafine, o le ala faamaonia lea e ulufale mai ai agaga o le mua'i olaga i le olaga faitino. O le tau-mamao atoatoa mai feusuaiga a o le'i faaiipoipo ma le faamaoni atoatoa foi pe a faaiipoipo, e puipuia ai le paia o lenei ala paia.

O se aiga e i ai se tane ma se ava faamaoni, o se nofoaga sili lena e mafai ona tausi ai le fanau ma faafaileleina i le amiotonu—ma mafai ai foi ona maua tulaga manaomia faaleagaga ma le faaletino o le fanau. E pei

lava foi ona tofu sao uiga tulaga ese o tane ma fafine i le atoatoaga o se sootaga faalefaaiipoipoga, e faapena foi ona taua na lava uiga mo le tausiga, faafaileleina, ma le aoaoina o le fanau. “E tatau ona fanauina fanau i totonu o feagai-ga o le faaiipoipoga, ma ia



Sa faaalii e Elder Parley P. Pratt ia faamanuiaga e oo mai pe a tatou aoao, ma malamalama, ma taumafai e faaoga aoaoga faavae e uiga i le faaiipoipoga.

tausia e se tama ma se tina o e ua faamamaluina ma le faatuatua atoatoa feagaiga faalelulugalii.”⁶

O Mataupu Faavae Taiala

O mafuaaga faavae e lua ua tatou toe iloiloina e uiga i le taua o le faaiipoipoga faavavau i le fuafuaga a le Tama mo le fiafia, ua fautuaina mai ai mataupu taiala mo i latou o loo sauniuni e faaiipoipo, mo i latou foi ua faaiipoipo, ma mo la tatou tautua i le Ekalesia.

Mataupu faavae 1: *O le taua o le faaiipoipoga faavavau, ua na o le li'o lava o le si'omaga o le fuafuaga a*

le Tama mo le fiafia, e mafai ona malamalama ai.

E masani ona tatou talanoa ma faamamafa le faaiipoipoga o se iunite faavae o sosaiete, o le faavae o se malo malosi, ma o se faalapotopotoga taua faalevafealoai ma faaleaganuu. Peitai, ua fesoasoani le talalelei tatou te malamalama ai [o le faaiipoipoga] e sili atu i lo lena.

Pe o tatou talanoa ea e uiga i le faaiipoipoga e aunoa ma le lava o le aoao atu o le taua o le faaiipoipoga i le fuafuaga a le Tama? O le faamamafa atu o le faaiipoipoga e aunoa ma se sootaga i le aoaoga faavae faigofie o le fuafuaga o le fiafia, e le mafai ona lava se taitaiga e maua ai, puipuiga, po o se faamoemoega i se lalolagi ua matua faateleina le faatupula'ia o le fenumia'i ma le amioleaga. O le a matuai aoga ia i tatou uma pe a manatua le aoaoga a Alema—“na aumai e le Atua o poloaiga [i le fanauga a tagata] ina ua *uma* ona ia faaali ia te i latou le ala o le toggiola” (Alema 12:32; ua faaopoopo le faatusilima).

Sa matagofie le faamatalaina e Elder Parley P. Pratt o faamanuiaga tatou te maua a o tatou aoao, ma malamalama, ma taumafai e faaoga i o tatou olaga le tulaga faavae taua o le faaiipoipoga.

“O Iosefa Samita lava na aoao mai ia te au le ala e faatauina ai le sootaga pele a le tama ma le tina, tane ma le ava; o le tuagane ma le tuafafine, o le atalii foi ma le afafine.

“O ia foi sa ou aoao mai ai e mafai ona faamau mai ia te a'u lo'u toalua faapelepele mo le olaga nei ma le faavavau atoa; ma o lagona mama atoatoa o le alofa lea e pele ai le tasi i le isi, e afua mai le puna o le alofa e faavavau. . . .



aiga o le totonugalemu lea o le fuafuaga o le fiafia. O le a faaauau pea ona faateleina le loloto, o le faalausosoo, ma le lavelave o osofaiga a le fili i faaiipoiga e faavavau.

Talu ai o loo tatou feagai i le taimi nei ma se taua mo le sologa lelei o faaiipoiga ma le aiga, o lea sa ou mataituina ai i la'u faitauga talu ai nei o le Tusi a Mamona, ia auala na sauniuni ai Sa Nifae mo a latou taua ma Sa Lamana. Sa ou matauina le nuu o Sa Nifae “sa latou *iloa le faamoemoega* o [lo latou fili] ma o lea, sa latou sauniuni ai e fetaia'i ma i latou” (tagai Alema 2:12; ua faaopopo le faatusilima). A o ou faitau ma suesue i ai, sa ou iloina ai, *o le iloa o le faamoemoega o se fili*, o se ki lea e manaomia muamua mo se sauniuniga lelei. E tatau foi ona tatou mafafau faapena pe o le a le faamoemoega o lo tatou fili i le taua o nei aso e gata ai.

Ua mamanuina le fuafuaga a le Tama ia maua ai le taitaiga mo Lana fanau, e fesoasoani ai ia te i latou ina ia fiafia, ma toe faafoi atu ai i latou ma le saogalemu ia te Ia. O osofaiga a Lusifelo i le fuafuaga, ua faamoemoe ia fenunia'i ma faanoanoa ai atalii ma afafine o le Atua, ma taofia ai lo latou alualu i luma e faavavau. O le faamoemoega aoao lava o le tama o pepelo, ia malaia i tatou uma e faapei o ia (tagai 2 Nifae 2:27), ma o loo galue o ia ina ia suia elemene e sili ona ia inoino i ai i le fuafuaga a le Tama. O Satani e leai sona tino, e le mafai ona faaiipoigo o ia, ma o le a le i ai lava sona aiga. Ma o loo taumafai pea lava pea e faafenumia'i ia faamoemoega paia o le kenera [ituaiiga o le tane po o le fafine], faaiipoigo, ma le aiga. Ua

“Sa ou alofa muamua, ae ou te lei iloa pe aisea. Peitai o lea ua ou alofa nei—ma se lagona mama atoatoa—ma le loloto, ma le faagaetia, lea e siitia a'e ai lo'u agaga mai mea le tumau o lenei lalolagi pagatia ma faalateleina ai e pei o le moana. . . . I se faaupuga faigofie, ua mafai nei ona ou alofa atu faatasi ma le agaga ma le malamalama.

“Peitai, i le taimi lena, sa na ona susu'e ai e si o'u uso pele o Iosefa Samita . . . se pito o le veli ma ou tepa tasi atu ai i le faavavau.”⁷

I le aveai ai o ni alii ma tamaitai, o tane ma ni ava, ma ni taitai o le Ekalesia, pe ua mafai ea nei ona tatou iloa ua na o le li'o lava o le si'omaga o le fuafuaga mo fiafia a le Tama, e mafai ona tatou malamalama ai i le taua o le faaiipoigo e faavavau? O le aoaoga faavae o le fuafuaga e taitai atu ai alii ma tamaitai ina ia faamoemoe ma sauniuni mo faaiipoigo e faavavau, ma e faaotilaloina ai ma manumalo mai i faaletonu e ono mafua ai ona faatuatuai nisi tagata

pe mumusu ai foi e faaiipoigo. O se malamalamaaga sa'o i le fuafuaga, e faamalosia ai foi la tatou faaiuga e faamamalu ma le mausali i le feagaiga o le faaiipoigo e faavavau. O le a faalateleina a tatou suesuega taitoatasi, o lo tatou aoao atu, ma lo tatou moli-mau atu e le gata i le aiga ae faapea foi i le lotu, pe a tatou manatunatu loloto ma malamalama atoatoa i lenei mea moni.

Mataupu faavae 2: E manao Satani ina ia malaia tane uma ma fafine e pei foi o ia.

E osofaia pea lava pea e Lusifelo ma mimilo ia aoaoga faavae e pito i sili ona taua mo i tatou taitoatasi, o o tatou aiga, ma le lalolagi. O fea e taulai atu i ai e le fili ana osofa'iga sili faatia-polo? E galue pea e le malolo Satani e faafememea'i le malamalama [o tagata] i le kenera [tane po se fafine] ina ia faalauiloa ai le faaogaina ma le faaletatau ma le le tonu o le mana e foafoa ai fanau, ma taofia faaiipoigo amiotonu—aemaise lava ona o le faaiipoigo ua faauuina e le Atua ma o le

tatou vaaia i vaega eseese o le lalolagi ia faamaoniga o le malolosi o taumafai a Satani.

E le'i leva atu, sa taumafai ai le tiapolo e tuufaatasi le fenumia'i o mafau-fau i le kenera ma le faaiipoipoga, ma pasia ai faaletulafono lena manatu sese. A o tatou vaavaai i tua atu o le olaga nei ma agai atu i le faavavau, e faigofie ona iloatino ai o isi auala taufaasese o loo fautuaina mai e le fili, e le mafai ona oo atu ai i le atoaga lea e mafai ona maua e ala i le faamauina faatasi o se alii ma se tamaitai, i le fiafia o le faaiipoipoga amiotonu, o le olioli i fanau, po o le faamanuiaga o le alualu i luma e faavavau.

Talu ai ua tatou iloa le faamoemoega o lo tatou fili, ua tatau ia i tatou taitoatasi ona matuai mataalia i le sailiga o musumusuga patino, pe mafai faapefea ona puipuia i tatou ma malutia a tatou lava faaiipoipoga—ma pe mafai faapefea ona tatou aoao mai ma aoao atu mataupu faavae sa'o i le aiga, ma o tatou tofiga i le Lotu e uiga i le taua e faavavau o le kenera ma le matafaioi a le faaiipoipoga i le fuafuaga a le Tama.

Mataupu faavae 3: *O faamanuiaga sili o le alofa ma le fiafia e maua lea i sootaga o feagaiga o le faaiipoipoga e faavavau.*

O le Alii o Iesu Keriso o le totonugalemu lea o se sootaga o se feagaiga i le faaiipoipoga. Faamolemole ia matau le Faaola o loo tuu i le tumutumu o lenei tafatolu, ma se tamaitai i le tasi tulimanu o le faavae ma se alii i le isi tulimanu o le faavae. Manatu la i le mea e tupu i le sootaga i le va o le tane ma le fafine a'o taitasi i la'ua ona "o mai ia Keriso" ma taumafai e "faatoatoaina ia te Ia" (Moronae 10:32).

O le Togiola, ma e ala mai foi ia te Ia, e tuufaatasia le tane ma le fafine.

A o tofu faalatalata atu le tane ma le ava (tagai 3 Nifae 27:14) i le Alii, a o aoao e i la'ua e auauna atu ma faapelepele e le tasi le isi, a o taufai fefaasoa'a'i o la'ua aafiaga o le olaga ma tuputupu a'e faatasi ma avea ma tino e tasi, ma a o faamanuiaina i la'ua e ala i le tuufaatasia o o la'ua natura tulaga ese, e le pine ae o la'ua iloina le fiafia lea e finagalo ai le Tama Faalelagi mo



E atili ona vavalalata le tane ma le ava pe afai e o mai ma le mauiinoa ia Keriso.

Lana fanau. O le fiafiaga tupito, o le faamoemoega tonu lava lea o le fuafuaga a le Tama, e maua e ala i le osia ma faamamaluina o feagaiga o le faaiipoipoga e faavavau.

I le avea ai ma alii ma tamaitai, o tane ma ava, ma taitai o le Ekalesia, o se tasi o o tatou tiutetauave e aupito sili ona taua, o le fesoasoani lea i alii ma tamaitai talavou ia latou aoao ma sauniuni mo se faaiipoipoga amiotonu e ala i a tatou faaitaiga patino. A matauina e alii ma tamaitai talavou le agavaa, faamaoni, ositaulaga, ma le faamamaluina o feagaiga i a tatou faaiipoipoga, ona saili foi lea o na talavou e faaitaitai i na lava mataupu faavae i a latou fegalegaleaiga i tafaoga ma

faaiipoipoga. A o matau mai e tupulaga talavou o loo avea le mafanafana ma le sologa lelei o a tatou sootaga e faavavau ma faamuamua aupito sili, ona latou le manatu faapito ai foi lea ae naunau e foai atu, tautua, ma fatufatu a'i se sootaga lelei ma le tumau. A vaaia e alii ma tamaitai talavou le faaloalo a'ia'i, faanaunauga, faatuatua, ma le alofa i le va o se tane ma se ava, ona latou taumafai foi lea e atiina ae na lava uiga i o latou olaga. O le a aoaoina e a tatou fanau ma tupulaga o le Ekalesia, mea e tele mai mea tatou te faia faapea foi o tatou lava tagata—tusa lava pe latou te manatuaina na o nai mea iti tatou te tautala ai.

Ae paga lea, e toatele tupulaga talavou o le Ekalesia e fefefe ma ua tautevateva i lo latou agai atu i ni faaiipoipoga e faavavau, ona ua taatele i le lalolagi ulugalii ua tatala faaiipoipoga, ma feagaiga ua malepelepe i aiga faapea le Ekalesia.

O le faaiipoipoga e faavavau ua le na o se konekarate faaletulafono mo sina taimi faapea e mafai ona faamuta i soo se taimi ona o soo se mafuaaga. O se osigafeagaiga paia ma le Atua e mafai ona noatia ai i le olaga nei ma le faavavau atoa. O le faatuatua ma le faamaoni i se faaiipoipoga, e le tatau ona na o ni upu faalaeiau e tautalagia i lauga, ae, o mataupu faavae e faamaonia i a tatou lava sootaga i feagaiga o le faaiipoipoga.

A o tatou mafaufau i le taua o la tatou faaitaiga patino, pe o tatou vaaitino ea i ni itu e manaomia lo tatou faaleleia? Pe o musuia ea e le Agaga Paia o tatou mafaufau ma faamaluluina o tatou loto—ma uunaia i tatou e fai ma ia sili atu? I le avea ai ma taitai o le perisitua ma ausilali, pe o

tatou taulai atu ea i le faamalolosia o faaiipoipoga ma le aiga?

E manaomia e tane ma ava se taimi e mafuta ai ina ia puipuia ai i latou lava ma o latou aiga mai osofa'iga a le fili. A o tatou taumafai e faalatelele atu o tatou valaauga i le Ekalesia, pe o tatou faalavelave ea ma le le faamoe-moeina ia tane ma ava ma tina ma tama mai le faataunuaina o o latou tiutetauave paia i aiga? Mo se faataitaitaiga, pe o tatou faatulagaina ea i nisi taimi ni fonotaga ma ni gaoioiga e le tatau ona faia, i se ala e faalavelaveina ai le sootaga taua i le va o le tane ma se ava ma lo latou sootaga ma le fanau?

A tatou manatunatu loloto ma le faamaoni i nei fesili, ou te talitonu e fesoasoani le Agaga i le taimi nei, ma o le a faaaauu pea ona fesoasoani ia tofu aoaoina e i tatou mea e tatau ona tatou faia i le aiga faapea foi i le Ekalesia.

O Punaoa Faaleagaga Tatou Te Manaomia

O o tatou tiute e aoao ma malamalama i le aoaoga faavae o le fuafuaga, e lagolago ma ave ma faataitaitaiga o faaiipoipoga amiotonu, ma aoao atu mataupu faavae sa'o i totonu o le aiga ma le Ekalesia, e ono mafua ai ona tatou taumanatunatu pe e mafai ona tatou faia le galuega. O i tatou o ni tagata faatauvaa e tatau ona faataunuaina se galuega e sili ona tulaga ese.

I le tele o tausaga ua mavae, sa ma pisi ai lava ma Sister Bednar e tau faafetaia'ia le anoanoai o tulaga manaomia o se aiga talavou ma le malolosi—faapea le Ekalesia, o galuega, ma tiutetauave o le alalafaga. I se



O se tasi o o tatou tiutetauave e aupito sili ona taua, o le fesoasoani lea i alii ma tamaitai talavou e aoao ma sauniuni mo se faaiipoipoga amiotonu e ala ia tatou faataitaitaiga patino.

tasi afiafi ina ua momoe tamaiti, sa umi se taimi o ma talanoa pe o le a le lelei o lo ma faatinoina o mea taua uma e tatau ona ma faamuamua. Sa ma iloina, o le a ma le mauaina ia faamanuiaga na folafola mai i le faavavau, pe afai ma te le faamamaluina atoatoa le feagaiga na ma osia i le olaga nei. Sa ma ioe faatasi e faia ma ia ave ma se tane ma se ava e sili atu [nai lo le mea o i ai]. O lena lesona sa ma aoaoina i le tele o tausaga ua mavae, ua maoae tele se suiga ua i ai i la ma'ua ulugalii.

O le aoaoga faavae suamalie ma le faatauvaa o le fuafuaga o le fiafia, ua aumaia ai le vaiga taua e faavavau—ma fesoasoani ai ina ia tatou malamalama i le taua o le faaiipoipoga e faavavau. Ua faamanuiaina i tatou i punaoa uma faaleagaga tatou te manaomia. Ua ia te i tatou le atoaga o le aoaoga faavae a Iesu Keriso. Ua ia te i tatou le Agaga Paia ma faaaliga. Ua

ia te i tatou sauniga faaola, o feagaiga, ma malumalu. Ua ia te i tatou le perisitua ma perofeta. Ua ia te i tatou tusitusiga paia ma le mana o le upu a le Atua. Ma ua ia te i tatou le Ekalesia a Iesu Keriso o le Au Paia o Aso e Gata Ai.

Ou te molimau atu ua faamanuiaina i tatou i punaoa faaleagaga uma tatou te manaomia e aoao mai ai, e aoao atu ai, e faamalosi ai, ma puipuia ai le faaiipoipoga amiotonu—ma e moni lava e mafai ona tatou ola faatasi i le fiafia o ni tane ma ava ma aiga i le faavavau. I le suafa paia o Iesu Keriso, amene.

FAAMATALAGA

1. Tagai i le tusi a le Au Peresitene Sili, 11 Feb. 1999; tagai *Liabona*, Tes. 1999, 1.
2. "O Le Aiga: O Se Folafolaga i le Lalolagi," *Liabona*, Oke. 2004, 49.
3. *Liabona*, Oke. 2004, 49.
4. *Liabona*, Oke. 2004, 49.
5. *Liabona*, Oke. 2004, 49.
6. *Liabona*, Oke. 2004, 49.
7. *Autobiography of Parley P. Pratt*, ed. Parley P. Pratt Jr. (1938), 297–98.

O Se Tiutetauave Paia e Alofa ma Tausi e Le Tasi le Isi

ELDER L. TOM PERRY

O Le Korama a Aposetolo e Toasefululua



Faapaleniina o O Tatou Tiutetauave

O le mataupu ua tofia ai a'u, o le fuaiupu lenei mai le folafolaga i le aiga: "O le tane ma le ava ua i ai le tiutetauave paia e alofa ma tausi e le tasi le isi ma a la fanau."¹ Ou te fia pa'i atu i lenei autu i se itu e matuai ese lava nai lo le mea ua outou masani ai, lea e faaoga i isi fonotaga faaleaoga. O le a ou le sii maia ni manatu se tele mai tusitaulima; ae, ou te fia

talanoa atu ia te outou mai le loto i le loto, e uiga i lau tautua i le malo o lo tatou Tama Faalelagi. O le faamoemoe, ina ia iloa ai pe mafai ona tatou malamalama lelei faatasi i le auala e faapaleniina ai o tatou tiutetauave ia alofa ma tausia o tatou aiga faatasi ai ma isi valaauga faapitoa ua tuuina mai e le Tama Faalelagi ia i tatou.

Ina ua faatulagaina le Ekalesia i le aso 6 o Aperila, 1830, sa maua ai e le Perofeta o Iosefa Samita se faaaliga ua avea nei ma vaega e 21 o le Mataupu Faavae ma Feagaiga. O le faitauga lenei o se vaega o le faaaliga.

"Faauta, o le a i ai se tala tusia faamauina e tausia e outou; ma o le a ta'ua ai oe i lea tusi o se tagata vaai, o se faaliliu upu, o se perofeta, o se aposetolo a Iesu Keriso, o se toeaina o le ekalesia e tusa i le finagalo o le Atua le Tama atoa ma le alofa tunoa o lo tatou Alii o Iesu Keriso,

"Na musuia e le Agaga Paia ia faataatia le faavae lea, ma ia atiina ae ai le atoatoa o le faatuatua paia. . . .

"O le mea lea, i le itu tau le ekalesia,

ia outou gauai i ana upu uma ma polo-aiga o le a tuuina atu e ia ia te outou e pei ona ia maua, ma savavali i ou luma i le paia atoatoa;

"Aua o lana upu o le a outou talia, e pei lava o loo alu atu mai ia te au, i le onosai uma ma le faatuatua" (MFF 21:1-2, 4-5).

O se tasi o faatonuga muamua lava na tuuina mai i lenei Ekalesia e fou lona faavaeina, o le mulimuli lea i musumusuga ma faaaliga mai le Alii, e ala i Lana perofeta, mo le faataunuuina o o tatou tiutetauave i le fausiaina o Lona malo. Ua ia folafola mai na te taitaiina i tatou i le ala e fai mo tatou e faaauuina ai lenei galuega maoae.

O Le Apoapoiga a le Perofeta

Ou te manatu ua tuuina mai e lo tatou perofeta o aso nei o Peresitene Gordon B. Hinckley, ia le ki e faapaleniina ai o tatou tiutetauave, i se fonotaga faaleaoga a taitai i le lalolagi atoa na muamua atu, sa faia i le aso 21 o Iuni, 2003. I lena faasalalauga sa ia saunoa ai:

"Ua ia te outou . . . le avanoa paia e tutu ai e fai ma sui o le Togiola o le lalolagi, a o tatou tauaveina lenei galuega. Ua ia te outou le avanoa e tautala atu ai i le matagofie o le toto togiola o le Alii o Iesu Keriso, e fai ma sui o Ona atalii ma afafine. Pe mata ea e mafai ona i ai se isi avanoa e sili atu nai lo lena?

"Ia olioli i le avanoa ua outou maua. O le a le tumau ai e faavavau lou avanoa. E le pine ona na o se manatua lea o le aafiaga maoae o loo e maua nei.

"E leai se tasi o i tatou o le a ausia mea uma tatou te mananao e fai. Ae ia tatou faia le mea sili tatou te mafaia.



I vaitau uma o le talafaasolopito, ua tuuina mai ai e le Atua Lana tulafono paia ina ia puipuia malu ai le paia o le tuufaatasiga o le tane ma le ava.

Ua faamalieina a'u o le a fetalai mai le Togiola, 'Ua lelei ia, le auauna lelei e ma le faamaoni' (Mataio 25:21).²

Pe a outou manatuaina, o lena faasalalauga sa ia faamalamalamaina ai a tatou matafaioi valafa. O le mea mua e faatatau lea i le mataupu o loo matou tautalagia i le faasalalauga lenei. Sa ia saunoa mai:

“Muamua, e matua taua tele lo tatou le tuulafoaiina o o tatou aiga. E leai se isi mea o ia te outou e sili atu ona taua. E onomea mo o outou tai-toalua ma a outou fanau le gauai atu o a latou tane ma tama. A oo mai le iuga, o le sootaga faaleaiga lenei tatou te o ma i tatou i le olaga a sau. Pe a ou toe faapuina upu o le mau e faapea, 'Se a le aoga i se tagata e ui ina sa auauna atu ma le faamaoni i le Ekalesia ae maumau lona lava aiga?' (tagai Mareko 8:36).³

Sa avea lenei mea ma savali faifai pea mai o tatou perofeta talu mai aso o le popofou o le faavaeina o le

Ekalesia. O le nofoaga e pito i sili ona taua mo le aoaoina o le talalelei ma tulaga faaletaitai, o totonu o le aiga. Afai tatou te mulimuli i nei aoaoga, o le a tatou tuuina atu [i la tatou auaunaga i le Ekalesia] tofiga ma fuafua ni polokalama, gaoioiga, ma vasega o le a ogatasi ma lagolagoina ai o tatou aiga.

Amata Faatulaga Mea e Tatau i ai le Faamua

O le auala tatou te faaogaina ai o tatou taimi ma faapaleniina ai o tatou olaga, e taua tele mo le auala tatou te faataunuuna ai foi o tatou tiute faaleaiga ma a tatou auaunaga i le Ekalesia. Ia pulea oe lava ina ia e mulimuli i le fautuaga a le perofeta i le faiga e faatulaga ai le faaogaina o lou taimi.

O Lau Soa e Faavavau

Ia amata e ala i le talanoaina faatasi ma lau soa e faavavau le tele o le taimi lua te manaomia faatasi e faamalosi ai

la oulua faaipoipoga [ulugalii], e faaali atu ai le alofa o le tasi mo le isi. O lou tiutetauave muamua lena.

E tatau ona fesoasoani le Ekalesia i tagata taitoatasi ma aiga ia o mai ia Keriso ma maua le ola e faavavau. O le ola e faavavau o le meaalofa sili lea a le Atua i Lana fanau, ma na o mafutaga faaleaiga lava e mafai ai ona maua. O lenei mafutaga e tatau lava ona amata i le faatasiga i le va o le tane ma le ava, lea e paia i le Alii ma o se mea e le tatau ona taaalo i ai. O le feagaiga o le faaipoipoga e taua mo le fuafuaga a le Alii ma le faamoemoega na Ia foafoaina ai le lagi ma le lalolagi. O vaitau uma o le talafaasolopito, ua Ia tuuina mai lana tulafono faalelagi e malu ma puipuia ai le faatasiga paia i le va o le tane ma le ava.

O Lau Fanau

Lona lua, ia tagai i manaoga faaleagaga o lau fanau. O le a le tele o le taimi e manaomia ina ia mautinoa ai o



O aoaoga aupito taua e mafai ona maua e le fanau, e tatau ona maua mai lea i o latou matua.

loo e latalata atu ia i latou? O lo outou tiutetauave o ni tama ma ni tina le saunia ia lava se taimi e aoao ai i latou, aua o aoaoga aupito sili ona taua o le a maua e fanau e tatau ona sau mai o latou matua. E tatau ona tatou masani i mea o loo aoao ai a tatou fanau e le Ekalesia, ina ia mafai ai ona ogatasi a tatou aoaoga i fanau taitoatasi, ma na foi aoaoga. Mo se faataitaiga, o le tamaitusi, *Mo Le Malosi o le Autalavou*, i le siiina mai o le folafolaga i le aiga, o loo tuuina atu ai i tupulaga talavou le fautuaga lenei e uiga i aiga:

“E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipoipoga ma aiga manuia e faavae ma tumau i mataupu faavae o le faatuatua, tatalo, salamo, faamagaloga, faaloalo, alofa, agalelei, galuega, ma gaoioiga faafiafia tuufaataasi.”⁴

E faaaau mai le tamaitusi:

“O le ave ma se vaega o le aiga o se faamanuiaga sili. E mafai ona e maua i lou aiga se mafutaga mafana ma le fiafia, e fesoasoani ia te oe ia e

aoaoina mataupu faavae sao i se sioiomaga alofa, ma e fesoasoani foi ia te oe ia e saunia mo le ola e faavavau. E le tutusa uma aiga, ae taua aiga taitasi i le fuafuaga a le Tama Faalelagi.

“Fai lau vaega ina ia atiina ae ai se aiga fiafia. Ia laufofoga fiafia, loto fesoasoani, ma mafaufau i isi. O le tele o faafitauli i totonu o le aiga, e afua mai i le soona tautatala faasausili po o le le alofa foi o tagata o le aiga. Taumafai ia ave oe ma se tasi e faatupuina le filemu ae le o le taufaafili, fia fusu, ma le faamisa. Ia manatua o le aiga o le iunite aupito paia lea o le Ekalesia.”⁵

Saunia o Mea e Manaomia mo Lou Aiga

O loo tatou tiutetauave lona tolu e ave i ai le faamuamua o le tausia lea o iunite o o tatou aiga. E toe sii mai le folafolaga i le aiga:

“I le fuafuaga paia, e tatau ona pulefaamalumu tama i o latou aiga i le alofa ma le amiotonu ma o i latou e tuuina atu mea e manaomia o le olaga

ma le puipuiga mo o latou aiga.”⁶

E ao ona tatou aoao ma faatumaina ina ni tomai lelei ina ia faigofie ai ona maua ni galuega. I se lalolagi fesuisuiai, e tatau ona faafouina pea o tatou tomai nei te’i ua le toe aoga. E ui lava ina tatou pisi i tofiga o le Ekalesia, ae e le tatau ona tatou misia ia avanoa e faateleina ai lo tatou atinaega ma faaleleia atili ai le manuia o o tatou aiga. E manaomia i lenei mea le lava o o tatou taimi ma mafaufau e faaoga tatau ina ia toe fua mai, e sauniuni ai mo le lumanai.

O lenei fautuaga e faatatau i tuafafine faapea foi ma uso. E ui lava ona o le matafaioi o le tausia o le aiga e fito-tonu i tama, ae ua faailoa mai i le folafolaga e faapea “o mea e faaletonu, oti, po o nisi mea e tulai mai”⁷ e ono manaomia ai foi outou tuafafine e faaoga ma atiina ae o outou tomai e fesoasoani ai i le tausiga o outou aiga.

Auaunaga i le Ekalesia

O la tatou faamuamua lona fa o la tatou tautinoga lea mo taimi tatou te

faaalu i gaoioiga faale-Ekalesia. O aiga malolosi o le Au Paia o Aso e Gata Ai, latou te faatauaina lo latou taimi i le Ekalesia ma faia ni filifiliga i o latou olaga faaleaiga, ia maua se avanoa [mo ia gaoioiga].

E ao i taitai ona nofouta faapitua i tulaga eseese faaleaiga pe a latou tuuina atu ni valaauga ma faia ni faamoe-moega. O aiga e i ai ni fanau laiti lea e tofu ai matua ma ni valaauga pisi, e aveesea mai ai i laua mai le aiga, atonu o le a manatu, ua faalavelave tele gaoioiga a le Ekalesia i o latou olaga faaleaiga. E mafai ona fesoa-soani atu taitai o le Ekalesia e ala i le faailoaina atu ma lagolagoina ia tau-mafaiga a tagata ina ia faapaleniina ia auaunaga i le Ekalesia ma o latou tiutetauave faaleaiga.

Faaaofia ai Tagata o le Aiga

O loo i ai ni auala e faateleina ai a tatou fegalegaleaiga ma o tatou aiga, a o tatou auauna atu i o tatou vala-auga i le Ekalesia e ala i le faaaofiaina o o tatou aiga ia tatou auaunaga

E mafai ona faateleina a tatou mafutaga ma o tatou aiga a o tatou galulue auauna atu i tofiga i le Ekalesia.



faale-Ekalesia, pe a talafea-gai ai. Sei ou tuuina atu se faaitaiga patino se tasi.

Sa avea lo'u tama ma o'u epikopo i tausaga amata o lo'u olaga. O ia o se alii pisi tele i se galuega faaloia. Sa malosi foi o ia i mataupu faalenuu ma sa manaomia tele aua o se tagata failauga i nofoaga faitele. Ma, ioe, o ia o se tama o se fanau e toaono. Sa ou faafetai lava i taimi uma ona sa sa'o ia tiutetauave sa ave i ai le faamuamua e lo'u tama. O tina lava lona tiute sa faamuamua i taimi uma. Sa mautinoa lava i le auala sa ia taulimaina ai o ia. Sa sosoo mai ai ma sona naunautaiga moni i lana fanau taitoatasi.

Pe tusa o le ono o o'u tausaga, sa ou maua ai se taavale toso mumu o se meaalofa o le Kerisimasi. E faapea uma lava le laitiiti. O le taavaleto-so mumu laitiiti sa avea ma se sootaga moni i lo ma'ua va ma lo'u tama. I lona olaga pisi, na te sailia ai ni auala e faaaofia ai lona aiga i ana gaoioiga e aunoa ma le tuuitiiti ai o le manuia o ona tiute.

O le tele o lana auau-naga o se epikopo na faia i le taimi o le Pau Tele o le Tamaoaiga i le



vaitaimi o le 1930. O le toatele lava o tagata o le matou uarota sa matuai matitiva lava. I le avea ai ma epikopo, sa ia te ia

le matafaioi o le aveina atu o mea e tausi ai i latou. O lenei mea sa foliga mai o se gaoioiga lelei lea mo se epikopo, ma lona atalii, ma le taavaleto-so mumu laitiiti.

Ou te sau i le fale mai le aoga ma vaaia ai, o loo faaputu i autafa o le faletaavale—o falaoamata, suka, sana ma isi sapalai. Sa ou iloa o lona afiafi o le a ma maua ai ma lo'u tama le avanoa e faatasi ai.

A taunuu mai o ia i le fale, e faatumu le taavaleto-so mumu laitiiti i uta e avatu i se aiga. O i ma'ua e toa-lua, e savavali ma talatalanoa, e faa-taunuu le ma galuega o le uelefea e ala i le la'uina o oloa ia i latou na manaomia.

Sa mafai ona ou vaai tino i le alofa ma le manatu popole o se taitai perisi-tua lelei mo tagata o lana uarota. O le mea e sili ona taua, sa ou maua ai se avanoa e faaalu ai se taimi taua ma lo'u tama.

Taula'i Atu i Mea Masani e Tatau ona Faamuamua

Ou te fautua atu ia te outou ia fai le mea na matou aoaoina atu i le uluai fonotaga faaleaoga a taitai i le lalolagi atoa. Matou te faamanatu atu ia te outou, o iunite uma o le Ekalesia ua i ai i ni tulaga eseese o le alualu i luma ma e tofu uma lava ma manaoga eseese. A fuafua a tatou polokalama faale-Ekalesia, e tatau lava ona silasila foi i aiga.

Matou te toe lapatai atu, ia aua nei faamafatiaina tagata o le au paia i ni valaauga e sili atu ma le tasi i le



Ekalesia, faaopoopo atu i ai ma le faiaoga o aiga ma le faiaoga asiati. Ia e aoao oe lava, ina ia mulimuli pea i matafaioi autu e tatau ona faamua-mua, ma o le a e maofa i le auala e taitaina ai oe e musumusuga a le Alii a o e faataunuina ou tiutetauave o le avefa ai ma auuina i Lona malo.

O le vaega taua e taulai i ai le Ekalesia toefuataiina o le faafaigofieina lea mo i tatou ma maua avanoa tatou e fesoasoani ai i le Alii i Lana galuega ia faataunu le faaofuina o le tagata i le tino ola pea ma le ola e faavavau. E tele ina tatou faia leni mea e ala i le faamalolosia o aiga. I se vai-aimi ua fai ifo ai uiga lelei, o le le mautonu i faiga faaupufai, faalavelave faavaomalo, ma le le mautu o le tamaoaga, e tatau lava ona faaleleia atili ma faalateleina lo tatou taulai atu i le faamalolosia ma le faamautuina o aiga. O le faamoemoega autu lava o le Ekalesia ia lagolagoina aiga

ina ia maua le faaolataga ma le faaeaga i le malo e faavavau o le lagi.

O Le Tusitaiala mo le Aiga

I ni tausaga ua mavae, sa tatou lolomiina ai le tusi faapitoa leni o le *Tusitaiala mo le Aiga*. E mo le faaogaina e tagata uma o le ekalesia, aemaise lava ia i latou faatoa liliu mai pe le lava foi le silafia i le Ekalesia. Matou te fautuaina outou ina ia faaoga. E amata i se faamatalaga:

“O le aiga o le iunite faavae lea O Le Ekalesia a Iesu Keriso o le Au Paia o Aso e Gata Ai ma o le iunite aupito taua faaleva-fealoai i le olaga nei ma le faavavau. Ua faatuina e le Atua aiga ina ia maua ai e Lana fanau le fiafia, ma mafai ai e i latou ona aoaoina mataupu faavae sao i se siosiomaga alofa, ma saunia ai i latou mo le ola faavavau.

“O le aiga o le nofoaga sili lea e

aoao atu ai, ma aoao mai ai, ma faaoga ai mataupu faavae o le talalelei.”⁸

Matou te toe fautuaina outou ina ia faaoga aoaoga aoga o loo i leni tamaitusi.

O Le Faaitaiga a le Faaola

Sa auuina atu lo tatou Alii ma le Faaola i tagata taitoatasi, siitia e na solipalaina, tuuina atu le faamoemoega e na lotovavai, ma sailia e na leiloloa. O Ana afioga ma galuega, sa Ia faaali atu ai i tagata e alofa ma malamalama ma talisapaia i latou. Sa Ia silafia uiga paia ma le taua e faavavau o tagata taitoatasi. E oo lava i le valaauina o tagata ina ia salamo, Na te teenaina le agasala e auuina ma le teenaina o le tagata agasala.

E pei foi o lo tatou Faaola, i le avefa ai ma taitai o le Ekalesia, e tatau lava ona tatou alofofa i tagata o loo tatou auuina atu i ai, ia faaali atu tatou te amanaia ma popole mo i latou taitoatasi, tuuina atu ia i latou le alofa ma le faamoemoega. Ou te tatalo ia faamanuia i tatou e le Alii i tiutetauave paia ua Ia tuuina mai ia i tatou. I le suafa o Iesu Keriso, amene.

FAAMATALAGA

1. “O Le Aiga: O Se Folafofaga i le Lalolagi,” *Liabona*, Oke. 2004, 49.
2. “Olioli i le Avanoa e Galue ma Auuina Atu Ai,” *Fonotaga Faaleaoga a Taitai i le Lalolagi Atoa*, 21 Iuni 2003, 23.
3. *Fonotaga Faaleaoga a Taitai i le Lalolagi Atoa*, 21 Iuni 2003, 22.
4. *Liabona*, Oke. 2004, 49.
5. *Mo Le Malosi o le Aulavou* (tamaitusi, 2001), 10.
6. *Liabona*, Oke. 2004, 49.
7. *Liabona*, Oke. 2004, 49.
8. *Tusitaiala mo le Aiga* (2001), 1.

O Le Tusitaiala mo le Aiga (itama nu. 31180 890) e mafai ona maua mai i faletusi o le Ekalesia ma ofisa autu o auuina.



Ua I Ai i Matua Se Tiute Paia

BONNIE D. PARKIN

Peresitene Aoao o le Aualofa



O Tiutetauave Faaleaiga

Afai e i ai se mea se tasi ou te manao e tupu mo matua ma taitai o lenei Ekalesia, o lo latou lagonaina lea o le alofa o le Alii i o latou olaga i aso taitasi, a o latou tausia fanau a le Tama Faalelagi. Atonu e le mu lou loto i se mea ou te fai atu ai, ae o mea e musumusu atu ai le Agaga ia te oe. Ia mulimuli i na uuna'iga matagofie.

Ou te manatua lelei ina ua tuuina mai le folafolaga i aiga: i le aso 23 o Setema, 1995. Sa ou nofo i totonu o le Tapeneko i le sauniga aoao a le Aualofa. O Peresitene Hinckley le faila-uga faaii. Sa ia fofogina mai ai “O Le Aiga: O Se Folafolaga i le Lalolagi”. Sa

matua leai se mea e gasē i le potopotoga, peitai sa i ai foi se lagona o le sagisagi fiafia, o se tali atu, “Ioe—matou te moomia lava se fesoasoani mo o matou aiga!”

Ou te manatua lo'u lagona e sa'o lelei. Sa tafe ifo loimata i o'u alafau. A o ou tilotilo atu i uso sa i o'u tafatafa, sa foliga mai o o latou lagona fo'i na. Sa tele naua mea sa i ai i le folafolaga, ma sa tau le mafai ona ou faatali se'i maua se kopi ma suesue ai loa. O loo faamautu mai i le folafolaga le mamalu o tamaitai. Ma, o se mea ofoofogia le mua'i tuuina mai i tamaitai o le Ekalesia i le sauniga aoao a le Aualofa—Ou te iloa e faatauaina tele ia tamaitai e Peresitene Hinckley.

Ua tatou i ai uma iinei o ni taitai faale-Ekalesia. E pisi tele i tatou. Peitai e tataua lava ona ou manatua—e faapei foi o outou—o lo tatou uluai tiutetauave o o tatou lava aiga. Ia manatua, o o tatou aiga o se tasi lea o nai faamanuiaga tatou te aveina i le faavavau!¹ O Newel K. Whitney o se epikopo i le popofou o le Ekalesia i Katelani. E faapei foi o outou epikopo i ona po nei, atonu ai foi sa matua'i pisi lava o ia i le faiga o le mau mea lelei. Peitai, sa a'oa'i o ia e le Alii ma poloaiina ina ia “faatulaga lelei *lona* aiga” (MFF 93:50; ua faaopoopo le faatusilima). Uso e

ma tuagane, e faatatau foi lenei apoapoaiga ia i tatou uma lava.

O le toatele o outou o matua po o matua foi o matua, a le o lena, o le a i ai se aso o le a e oo ai i ai. Peitai, pe ua e faaipoipo pe leai, o i tatou uma lava o ni tagata o aiga. Mafaufau mo sina minute i lou lava aiga. O le a se mea e te fiafia ai i ai? O se mea se tasi ou te fiafia ai i lo'u aiga o le, Ou te olioli lava ona e fiafia la'u fanau tama e toafa e faatasitasi.

O le a le aoaoga faavae e uiga i le aiga o loo aoao mai e le folafolaga? Ou te fia taula'i atu i se parakalafa e tasi: “I le fuafuaga paia, e tataua ona pulefaamalumalu tama i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiiga mo o latou aiga. O uluai matafaioi a tina o le faafaileleina lea o a latou fanau. O nei matafaioi paia, e ao i tama ma tina ona fesoasoani le tasi i le isi o se paaga tutusa.”²

Ou te fiafia lava i upu, “i le fuafuaga paia”. O le aveia ma matua o se vaega o le fuafuaga paia a lo tatou Tama Faalelagi mo Lana fanau. O le aveia ai ma matua, ua i ai ia te i tatou matafaioi paia e saunia ai mea e manaomia i le olaga, puipui ma faafailele o tatou aiga.

E mafai faapefea i nei taiala e—*saunia ai mea e manaomia, puipui*, ma *faafailele*—ona fesoasoani ia i tatou e tausia ni fanau amiotonu?

Saunia mea e manaomia

O loo faapea mai le folafolaga, o matua e saunia ia “mea e manaomia o le olaga.” Ae o a la mea e manaomia i le olaga? Ioe, o se fale ma meaai i luga o le laulau. Peitai, ona o le fuafuaga faaletalalelei, ua tatou iloa ai e tele atu isi mea. E aofia ai tomai o le olaga—o



mea e fausia ai le amio. Se'i o tatou talanoaina nisi o nei mea.

Tatou te saunia mea mo a tatou fanau a o tatou aoaoina i latou pe faapefea ona galulue. Se'i ou faamatalaina atu e uiga ia Iakopo le atalii o la'u tama. Sa le i fia alu o ia i le aoga. Sa taumafai e lona tina le anoanoai o au ala eseese. Na i'u lava ina faanofo o ia i lalo e lona tina ma fai atu i ai, "O le galuega a lou tama o le alu e faigaluega e su'e mai tupe. O la'u galuega o le nofo lea i le fale e tausi oe ma ou uso ma lou tuafafine. A o lau galuega Iakopo, o le alu lea i le aoga." Ina ua malamalama Iakopo i le mataupu faavae, sa ia taliaina loa ma alu i le aoga.

Tatou te aoao foi a tatou fanau ia galulue e ala i le faamoemoe latou te faia feau ma, pe a oo foi ina talafeagai, ia o e galulue i fafo atu o le aiga. Tatou te fesoasoani i a tatou fanau e saunia mea mo o latou olaga e ala lea i le aoaoina o i latou i le taua o le galue. Ia vave ona amata! Fai mai lo'u toalua o le meaolofa aupito sili na avatu e lona tama ia te ia o le tutoatasi—aua sa ia aoaoina o ia e galue.

O le pulea lelei o a tatou tupe e fesoasoani foi lena e avea ai i tatou ma

tagata lelei e saunia mea e manaomia. O oulua matua, ia fuafua faatasi e ola i se paketi. Aoao lau fanau i le eseese o le mana'o [i se mea] ma le manaomia [o se mea]. Aua nei tuuina atu ni avega e le faavaea o mea tautupe i lou toalua. Ina ua fautuaina i tatou e Peresitene Hinckley ina ia o ese mai le aitalafu, e i ai se tamā ou te iloa, sa nonofo i lalo ma lana fanau ua faaipopo ma fesili atu ia te i latou e uiga i a latou tupe. Sa ofo o ia ina ua ia iloa, e toalua e matua tetele lava aitalafu. Sa fesili atu o ia ia te i latou pe mafai ona ia fesoasoani i le faiga o se fuafuaga.

O a'oa'oga ma le a'oa'o faamasani e mafai ai e matua ona saunia mea e manaomia mo o latou aiga. Tima'i i lau fanau ina ia pu'epu'e mai a'oa'oga uma latou te mafaia. E i ai nisi atunuu e le mafai e le tupulaga ona faia ni faaunega tupe i le Teugatupe Faaagaga mo A'oga, ona e le'i mae'a a latou aoga maualuluga. I le lalolagi i ona po nei, e taua tele i matua ona latou aoao pea.

Puipui

O le mataupu faavae lona lua ou te fia tautala i ai, o le *puipui*. Puipui mai i le a? Mai faatama'iga—e le gata i le faaletino ae faapea foi i le faaleagaga. Tatou te puipui pe a tatou aoaoina a tatou fanau e i ai lo latou tāua faalelagi, [tatou te puipui] pe a tatou o faatasi o se aiga i le lotu, pe a fai a tatou afiafi faaleaiga, pe a fai a tatou tatalo faale-

aiga, pe a tatou suesue faatasi i tusitusiga paia. O ni mea faigofie tele na mea uma, peitai ou te tautino atu ia te outou e maua ai le puipuiga mamana.

Ua aoao mai i le folafolaga, ua i ai i matua le tiute paia e puipuia a latou fanau. E mafai ona faatautala pe saua ina lagona, e pei o le ta'u faatauvaaaina o se toalua po o se tamaitiiti, fai mai e leai se aoga, o le le faaalua ma ta'u atu i ai le alofa. E le o puipuia e tama o latou aiga pe a latou sasa, taia, pe fasi a latou ava po o fanau. Fai mai se uso mai Aferika i Sisifo, a o le'i auai i latou i le Ekalesia, e fasi lava e lona tama lona tina ma le fanau. "O le taimi nei," fai mai a ia, "ua taulimaina nei i matou [e lo'u tama] ma le faaaloalo ma le agamalu, aua ua malamalama o ia o i matou o fanau a le Atua."

E puipui e matua a latou fanau e ala i lo latou iloa o uo latou te filifilia. Sa ita se tasi teineitiiti talavou ina ua fesiligia o ia e lona tama e uiga i ana gaioiga i le afiafi. Sa faamalalama i ai e le tama, o loo fai mai le folafolaga [i Aiga] e tatau ona avea o ia ma se puipui i lona aiga, ma e alofa o ia i lona afafine ma o le mafuaaga foi lena e manao ai ia mautinoa o loo saogalemu o ia.

E tatau foi ona tatou puipuia a tatou fanau mai aafiaga o faasalalauga. Ia iloa mea e matamata ai lau fanau i le televise, o faletifaga ma aiga o a latou uo. Afai e i ai sa outou komepiuta i le fale, ia mautinoa o faaoga mo mea e "mama, matagofie, logolelei, po o le ta'uleleia foi" (Mataupu Faavae o le Faatuatua 1:13).

E puipuia i tatou pe a tatou mulimuli i le perofeta soifua. Na puipuia

faapefea outou o se aiga i le mulimuli i le apoapoaiga a Peresitene Hinckley e faitau le Tusi a Mamona? Na ou faitau talu ai nei i se tusi mai se uso i Egelani. Sa ia tusia e faapea:

“Sa tauivi lo’u aiga i le tausaga ua tuana’i ma se tama na filifili e le toe alu i le lotu. Sa toaga i lona olaga atoa ma sa i ai foi i au epikopo. Sa tagi atu lo’u loto i le Alii pe o le a se mea e mafai ona ou faia, ina ia aua ai ne’i ou lagonaina le ita ma le inoino. E fai lava la matou afaifi faaleaiga e na o a’u ma le fanau. A o ou i ai i le malumalu, sa uuna’ia a’u ona o le lu’i e faitau le Tusi a Mamona, ina ia aua ne’i faia na o i matou ma le fanau le faitauga tusitusiga paia, ae ia ave le fanau ma tusitusiga paia i lo’u toalua, pe o fea lava le mea o le fale o i ai. O le mea lea, e alu ai la matou solo i po uma i le ta o le 9.00 e su’e o ia. Matou te faitau faatasi ma ia—o le taimi muamua e le’i faitau, ae o le taimi nei o lea ua faitau.



O lea ua alu i le lotu, ua sau i a matou afaifi faaleaiga, ma ua ia ta’ita’ia foi a matou talanoaga faaletalalelei. Na avea la’u fanau ma vae o le Alii e aveina atu ai le upu o le alofa togioa i lo’u toalua. O se faamanuiaga tele lea i lo’u aiga.”

Faafailele

O le taiala lona tolu ma o le toe taiala foi lea, o le *faafailele*. O a foliga o le faafailele? O le a se faalogona o le faafailele? E faape’i lona leo? O foliga, lagona, ma le leo o le faafailele e pei o le mau lea “tau lava o le tauanau atu, i le faapalepale, o le agalelei, ma le agamalu; ma le alofa faamaoni” (MFF 121:41–42). Se’i ou faasoaina atu ni nai faataitaiga.

Ou te manatu o le faafailele e foliga i le a’oa’i ma le alofa. O se tasi tina talavou na te taofia lana tama pe a le usitai. E tago tuu



ona lima faaofuofu i alafau o lana tama ma tilotilo sa’o atu i ona mata ma faapea atu, “Faalogo mai i a’u upu.” E tataua ona tatou aoaoina a tatou fanau e faia filifiliga poto, ae e le mafai ona tatou aveesea taunuuga o a latou mea e fai. Manatua, o le faavae o le fuafuaga a lo tatou Tama Faalelagi o le faitalia.

O le a se faalogona o le faafailele? O le tele lava o aoaoga ma le fausiaina o sootaga i aiga, e tula’i mai i nai taimi pupuu e le fuafuaina, i a tatou mea e masani ai i aso taitasi. O le laulau ‘ai o se nofoaga lea e fesoota’i ai le tasi ma le isi; fefaa-soaa’i i a tatou gaoioiga i aso taitasi, faalogologo ma tima’i atu e le tasi le isi, ma talie faatasi ai. Ou te iloa o le talie e mama ai se avega. Tama e ma tina pele, fai se taimi se tasi e aai faatasi ai tagata e te alofa i ai.

Pe ua uma ai ea le avea o oulua ma matua pe a matutua la oulua fanau ma ta’itasi ma o? E leai, e le uma ai. Peitai, o loo tatou i ai i le galuega o le fatuina o aiga e faavavau. A o ma galulue ma lo’u toalua i le misiona i Egelani, sa o

mai se tasi o o ma atalii ma lona aiga e asiase mai. Ou te manatua lana tala, “Na matou o mai ona e manaomia le faafai-leleina o i matou.” O le taimi lava e avea ai oe ma se matua, o le a tumau ai pea lava. Pe le ofoofogia ea lena tulaga? Ina ua uma ona ou faitauina le Tusi a Mamona ia Tesema, sa segia a’u ina ua ou iloina sa apoapoa’ia foi e Mamona lona atalii matua, o Moronae: “Lo’u atalii e ia e faamaoni ia Keriso . . . ia faaea-ina oe e Keriso . . . ia tumau e faavavau i lou loto lona alofa, ma le onosai, ma le faamoemoe o lona mamalu, ma le ola faavavau” (Moronae 9:25).

E faape’i le leo o le faafailele? O nisi taimi e faigata ona maua mai i se tamaitiiti o le tupulaga se tali e sili atu i le tasi se upu. O se fesili lenei ua ou iloina le matua aoga e suia ai lena mea: “O le a se lu’itau po o se mea aupito sili o oulva feagai i le taimi nei?” O le a tatalaina ai le faitotoa e faasoa mai ai le talavou. Ma afai foi e faasoa mai, ia tau lava o lou faalogologo! Aua e te faamasino atu pe fautua atu pe faia se isi lava mea. Tau lava o le faalogologo. O le a e maofa i sootaga ma noataga vavalalata o le a tula’i mai. Epikopo ma fesoasoani, e mafai ona mamana lenei fesili e tasi pe a outou faatalanoaina le autalavou i a outou uarota.

O le faafailele e pei lava o le leo o le tatalo faaleaiga. O se tasi o mea e tumau pea ona ou manatua, o lo’u tama lea a o tootutuli faatasi ma o’u tuagane ma lo’u uso i tafatafa o le moega o o’u matua i si o la’ua tama’i potu, ma faalogo atu ai i le augani atu o lo’u tama i le Tama Faalelagi e faamanuia lo’u tina sa i le falemai. O lo’u faalogo atu i lo’u tama o sasaa atu lona loto, na fesoasoani lea ia te au ou te iloa ai o loo i ai se Atua i le lagi o loo

faafofoga mai. Tatalo mo a outou fanau, o a latou aoga ma lo latou puipuiga i le aso. E iloa e a tatou fanau lo tatou alolofa ma o tatou faamoemoega pe a faalogo mai o tatou tatalo mo i latou.

Faamalolosia o Aiga

I le avea ai ma se taitai, e faapefea ona e faamalosi ma lagolagoina ia aiga o i latou e te auauna atu i ai? E mafai ona e faaogaina nei taitai—saunia mea e manaomia, puipui, ma faafailele—e faamalolosi ai aiga o lau uarota.

E lagolagoina e taitai ia matua i lo latou faamamaluina lea o i latou, ae le o le laa i luma e aveese le matafaioi a matua mai le olaga o se tamaitiiti. E mafai ona avea oe ma se faufautua, faasoa atu mea e fiafia i ai, ae ia gaua’i atu pea i le ala e mananao matua e faataunuu ai se mea. Sa faamatala e se tasi tina: “E tele taimi sa foliga mai ai ia te a’u, o tagata mulimuli lava e fia faalogo i ai le ma fanau tama talavou o a’u ma lo’u toalua. E i ai taimi, e gaua’i atu ai la’u fanau tama i faatosinaga a le tupulaga, ma latou le faalogo ai i matua. Ou te faafetai lava ona o taitai atamamai o le Ekalesia sa fautuaina la ma fanau tama. Latou te le’i aveesea la ma matafaioi o ni matua. Sa latou faalogo atu i ai, ae sa latou lagolagoina la *ma’ua* taitaiga, ma toe taitai mai ai i latou ia i ma’ua.”

E tofu i tatou ma mea e manaomia i o tatou aiga. Na o ni nai upu tima’i mai le loto mo tina o loo faia toatasi le faiva faamātua. Se’i ou faamatalaina atu se tala i se tina e toalima le fanau, ae sa auina atu lona toalua i Iraq i le 2003. Sa ia faamatala mai:

“Ina ua alu lo’u toalua i Iraq i le amataga o Fepuari, e tolu a matou taavale lelei sa i ai. Peitai, e oo atu ia

Novema, ua leaga uma taavale, ma sa le’i mafai ona toe lipea le lua. O le taimi lava foi lea, na fai mai ai la’u tama ua sefulufitu tausaga e le alu i se misiona aua na te le o mautinoa pe moni le talalelei. Afai na i ai se taimi i lo’u olaga sa ou matua manaomia ai ia faamanuiaga faaleperisitua, o le taimi lena. Ou te le o manatuaina faamatalaga uma pe o anafea ae po o fea foi, peitai e manino lo’u manatuaina o le silia ma le tasi faamanuiaga mai le au perisitua alolofa i lena taimi. Sa ou iloa i taimi uma, e mafai ona ou valaau atu i o’u faiaoga o aiga ma o le a la o mai. Sa leai se tasi o i la’ua e mafai ona faia la’u veni, ae sa mafai ona la tuuina mai se faamanuiaga faaleperisitua sa ou matua manaomia, ma sa la mauaina se tagata e mafai ona faia le taavale.”

Sa faia e faiaoga naunautai o aiga se suiga mo lenei aiga, ma e mafai ona latou faia se suiga mo aiga uma e na o le tama pe na o le tina foi, pe a latou iloa i latou, ma latou talitonuina ma tuuina atu i ai faamanuiaga faaleperisitua. Epikopo, taitai vaega o faitaulaga sili, peresitene o korama a toeaia—e manaomia e nei tina ia faamanuiaga faaleperisitua i o latou aiga, e faapei foi o tuafafine maoa’e nofufua.

Sa lapata’i mai Peresitene Hinckley e uiga i le “sosolo malie o le pisipisia o le lalolagi” i le 10 tausaga talu ai, ina ua tuuina mai le folafolaga. O lea tautinoga faaperofeta ua toe faamautuina ai “tulaga faatonuina [o le Alii], o aoga faavae ma faiga e faatatau i le aiga.”³ I se faatusatusa atu i ai, ua tau-mafai le lalolagi e faoa ia matafaioi a tamaitai ma tulaga faatina. Ua ta’u atu i tamaitai i ona po nei e manaomia le i ai o ni a latou galuega lelei, o faalapotopotoga e auai, ma ia latou maua ia



E lagolagoina e taitai ia matua i lo latou faamamaluina lea o i latou, ae le o le laa i luma e aveese le matafaioi a matua mai le olaga o se tamaitiiti.

mea e tausi ai, le fanau. Ua matua faateleina le se'e ese atu o le matafaioi mamalu a le tina. Se'i ou faamanino atu lava le mea lea: e le tatau ona tatou faatagaina le lalolagi e fetuutu-una'ia le mea ua tatou iloa, na tuuina mai ia te i tatou i le mamanu faalelagi.

Uso e, se'i ou tautala tuusa'o atu ia te outou mo sina minute. I le avea ai ma uso o le Aualofa O Le Ekalesia a Iesu Keriso o le Au Paia o Aso e Gata Ai, o lo tatou faamanuiaga ma le tiute-tauave le faafaiilele ma lagolago le iunite faaleaiga. O tagata uma lava o se itutino o se aiga, ma e manaomia e aiga taitasi ona faamalosi ma puipuia.

O lo'u fesoasoani sili lava e avea ma se tausi aiga, na mua'i oo mai mai lo'u lava tina ma lo'u tina matua, ma sa sosoo ai ma uso o le Aualofa i uarota eseese sa matou nonofo ai. Sa ou aoaoina tomaji; sa ou vaaia ai le olioli e maua mai le foafoaina o se aiga e fia mananao isi tagata e nonofo ai. Na amata ia Ianuari 2006, ua i ai taiala fou mo fonotaga ma gaoioga o le faata-maoaigaina o le aiga, auaiga, ma le tagata lava ia. Ua tele ina mafai ona fetuutuunai ina ia mafai ai e uso uma ona auai i le Aualofa. Taitai o Aualofa

e, ia mautinoa o fonotaga ma gaoioga tou te fuafuaina, o le a faamalolosi ai aiga o uso uma lava.

O faiaoga asiasi o se tasi lea auala e lagolagoina ai le aiga. Ou te faamoe-moe ua tofu maua e outou uma se avanoa e avea ai ma faiaoga asiasi. O faiaoga asiasi e le gata ina faamalosi ai se uso i le faaleagaga, ae i se tulaga uiga ese, e faafaiilele ai foi ma iloilo tulaga e manaomia. Taitai o le Aualofa, ia mataala i a outou fonotaga faale-uelefea ma lipoti atu tulaga manaomia faaleagaga ma le faaletino na faailoa mai e o outou faiaoga asiasi.

O Le Alofa Mama o Keriso

O outou na ua faaiipoipo, toe tepa i tua. O le a le mea na e alofa faavalea ai i lou toalua? O le manatuaina o lena mea e mafai ai ona e maua se loto faa-magalo. Fefaaalia'i le alofa o le tasi i le isi. E mafai e se ava ona faia se suiga i le olaga o lana tane, a o ia fausiaina lona tulaga talitonuina. E mafai e se tane ona faasusulu se aso aupito pogisa i nai upu faatauvaa lava nei: "Ou te alofa ia te oe." O se tasi o mea-alofa aupito sili e mafai e matua ona avatu i a latou fanau o le faaali atu

lea ia i latou e fealofani i la'ua.

O la tatou matafaioi o ni matua i le tausiga o fanau amiotonu, o le saunia lea o mea e manaomia, puipui, ma faafaiilele ma e tatou te faia na mea o ni paaga tutusa. Tatou te faia foi lena lava mea e tasi o ni taitai. O le avea ma se taitai, o se galuega faigata. O le avea ma se matua, o se galuega faigata. E i ai taimi tatou te lotovaivai ai, ae tatou te taumafai lava. Ou te manatu e tele naua mea tatou te aoaoina e uiga i le alofa mama o Keriso i o tatou aiga, faapea foi i le auanaga i le Ekalesia.

I le avea ai o ni matua ma ni taitai, e tatau ona tatou tuuina atu i a tatou fanau le alofa ua tuuina mai e lo tatou Tama Faalelagi ia te i tatou: o le alofa mama. I le Moronae 8:17, e faitauina faapea, "Ua tumu a'u i le alofa, o le alofa faavavau lena." Faaopoopo atu i ai ma upu a le Alii: "Ia faaoofuina outou i le noataga o le alofa, e pei o le ofu talalao, o le noataga lea o le atoatoa ona lelei ma le filemu" (MFF 88:125). Ou te valaaulia outou, i mea uma lava tou te fai, ia oofu outou i le ofutalalao o le alofa, ia siomia lou aiga i le alofa mama o Keriso.

I le avea ai ma ni aiga ma ni taitai, ia faamanuiaina outou e le Alii ina ia outou si'osi'o maia i latou tatou te alofa i ai, i le ofutalalao o le alofa ina ia mafai ai ona tatou toe foi atu i le afi-aga o lo tatou Tama i le Lagi, ma ola faatasi ai ma Ia e faavavau. I le suafa o Iesu Keriso, amene.

FAAMATALAGA

1. Tagai Gordon B. Hinckley, "Olioli i le Avanoa e Galue ma Auauna Atu Ai," *Fonotaga Faaleaaoaga a Taitai i le Lalolagi Atoa*, 21 Iuni 2003, i. 23.
2. "O Le Aiga: O Se Folafolaga i le Lalolagi," *Liabona*, Oke. 2004, 49.
3. "Ia Tu Malosi e Tete'e Atu i Togafiti a le Lalolagi," *Liabona*, Ian. 1996, 119.

O Aiga Faalelagi, O Aiga e Faavavau

PERESITENE THOMAS S. MONSON

Fesoasoani Muamua i le Au Peresitene Sili



Fausiaina o se Aiga Faavavau

I le agaga o le lotomaulalo, ou te tu atu ai e avea ma sui o le Au Peresitene Sili e fai ma tootoo faai mo lenei fonotaga. Ua musuia lava i tatou ma faamalamalamaina i saunoaga a Elder Bednar, Elder Perry, ma Sister Parkin. Ua taula'i atu o tatou mafaufauga i le aiga ma le auaiaga a o faamanatu mai ia te i tatou “o le aiga o le faavae lea o le olaga amiotonu, ma e leai lava se isi meafaigaluega e mafai ona suia lona tulaga pe faatinoina ana matafaioi taua.”¹

O se aiga, e sili atu i le na o se fale e fausia i laupapa, piliki po o ni maa. E fausia se aiga i le alofa, ositaulaga ma le faaaloalo. O i tatou e i ai le

matafaioi mo aiga tatou te fausia. E tatau ona tatou fauina ma le potu, aua o le faavavau e le o se malaga puupuu. O le a i ai le toafilemu ma matagi, o le lasusulu ma ao pogisa, o le olioli foi ma le faanoanoa. Peitai, afai tatou te taumafai moni lava, e mafai ona avea o tatou aiga ma sina vaega o le lagi i le fogaeleele. O mea tatou te mafaufau i ai, o mea tatou te faatino, o olaga tatou te ola ai, e le gata ina ta'a'ina ai le manuia o la tatou malaga i lenei lalolagi; ae e faailogaina ai foi le ala i a tatou sini mo le faavavau.

O nisi o aiga o le Au Paia o Aso e Gata Ai o loo i ai se tina, se tama, ni atalii, ma ni afafine o loo mafuta faatasi uma i le fale, ae o i ai foi nisi ua molimauina ma le faavavau le toe-sea o se tasi, ona sosoo ai lea ma le isi, ma le isi o lo latou aiga. O nisi taimi e na o le toatasi lava se tagata o se aiga. Pe o le a lava le tulaga, e faauau pea le aiga—aua e mafai ona faavavau aiga.

E mafai ona tatou aoao mai le mataisau tusiata—o le Alii lava lea. Ua uma ona Ia aoao mai i tatou i le ala e tatau ona tatou fausia ai. Sa Ia fetalai mai: “O aiga . . . uma e fevaevaea'i, e le tumau” (Mataio 12:25). Na ia toe lapatai mai mulimuli ane: “Faauta, o

lo'u fale o le fale faatulagaina tonu ma tatau . . . ae le o se fale o le faasoesa.” (MFF 132:8).


I se faaaliga na tuuina mai e ala mai i le Perofeta o Iosefa Samita i Katelani, Ohio, 27 Tesema, 1832, sa apoapoai mai ai le Matai, “Ia outou fatulagaina; ia saunia mea tatau uma; ma faatuina se fale, o se fale tatalo lea, o se fale o le anapogi, o se fale o le faatuatua, o se fale o le aoaoga, o se fale o le mamalu, o se fale o le tulaga maopo-opo, o se fale o le Atua” (MFF 88:119; tagai foi 109:8).

O fea se mea e mafai ona maua ai e se isi o i tatou se ata pito sili ona lelei e mafai ona fausia ai ma le potu ma le sa'o [se fale]? O lena fale ua talafeagai tonu lava ma le fale o loo faamatala mai i le Mataio, o se fale ua fauina “i luga o le papa” (Mataio 7:24, 25; tagai foi i le Luka 6:48; 3 Nifae 14:24, 25), o se fale e lavatia uaga o puapuaga, o lologa o mea tuu faafeagai ma matagi o masalosaloga i soo se mea i lo tatou lalolagi fesuisuia ma lu'itauina.

Atonu o le a fesili nisi, “Ae o le faaaliga lena na tuuina mai e saunia ai se taiala mo le fausiaina o se malumalu. Pe i ai sona sootaga ma tulaga o aso nei?”

Ou te tali atu, “Pe lei fai mai ea le Aposetolo o Paulo, ‘Tou te le o iloa ea o le malumalu outou o le Atua, o loo nofo foi le Agaga o le Atua i totonu ia te outou?’ ” (1 Korinito 3:16).

Ia avea le Alii ma matuaofaiva autu mo le fauina o lo tatou fale. Ona mafai lea ona avea i tatou taitoatasi ma aufaigaluega e tofu ma se vaega taua o le galuega atoa. O lona uiga o i tatou uma lava o ni faufale. E le gata i le fauina o o tatou lava fale po o aiga,



“Ia outou faatulagaina; ia saunia mea tatau uma; ma faatua se fale, o se fale tatalo lea, o se fale o le anapogi, o se fale o le faatuatua.”

ae ua ia te i tatou foi le tiutetauave e fesoasoani e fausia le malo o le Atua i luga o le fogaeleele e ala lea i le auau-na lelei atu ma le faamaoni i o tatou valaauga i le Ekalesia. Se’i ou tuuina atu ni taiala mai le Atua, o lesona mai le olaga, ma manatu e mafaufau i ai a o amata ona tatou fauina.

Tootuli i lalo e tatalo.

“Ia e faatuatua ia Ieova ma lou loto atoa; a e aua le faalagolago i lou lava atamai. Ia e manatua o ia i ou ala uma, ona faatonuina ai lea e ia lava ou ala” (Faataoto 3:5–6). O le saunoaga lea a Solomona le alii poto, le atalii o Tavita, le tupu o Isaraelu.

I leni konetineti o Amerika, sa

tautino mai ai foi e Iakopo, le uso o Nifae: “Ia outou faamoemoe atu i le Atua ma le le faagaetia o le manatu, ma ia tatalo ia te Ia ma le faatuatua tele lava” (Iakopo 3:1).

Ua oo mai leni fautuaga paia musuia ia i tatou e pei o se vai e manino i se elelee naumati. O loo outou soifua ma tatou ola i taimi faigata.

I ni nai augatupulaga ua mavae atu, sa le mafai ona iloa faalemafaufau e se tagata le lalolagi lea ua tatou ola ai nei ma faafitauli o le a tula’i mai ai. Ua siomia i tatou i le ola le mama, o ponokarafi po o tusi ma ata mataga, o faiga malolosi ma le matautia, o fualaaui oona, ma le anoanoai o mea leaga ua

mafatia ai le lalolagi i nei ona po. Ua feagai i tatou ma le lu'i, faapea foi ma le tiutetauave, e le gata ia tausia i tatou lava "ina ne'i pisia mai i le lalolagi" (Iakopo 1:27) ae ia taialaina foi a tatou fanau ma isi o i lalo o la tatou tausiga, ia saogalemu mai vasa louloua o le agasala o loo siomia ai i tatou, ina ia i ai se aso tatou te toe foi atu ai e nonofo faatasi ma lo tatou Tama Faalelagi.

O le aoaoina o o tatou lava aiga, e manaomia ai lo tatou i ai, o o tatou taimi, ma a tatou taumafaiga aupito sili. Ina ia lelei lo tatou aoao atu, e tataua ona tatou malolosi i a tatou faaitaiga mo tagata o o tatou aiga, ma ia avanoa foi mo taimi patino e mafuta ai ma tagata taitoatasi, faapea foi se taimi e faufautua atu ai ma taiala.

E tele taimi tatou te maua ai le



lagona lofituina ona o le galuega o i o tatou luma. Peitai, e i ai pea lava le fesoasoani i taimi uma. O Ia o Lē na te silafia Ana fanau taitoatasi, o le a tali mai ia tatou tatalo faatauana ma le loto, pe a tatou saili atu mo se fesoasoani e taialaina ai i latou. O na tatalo o le a foia ai faafitauli, e tuumamaina ai le tele o mafatiaga, e puipuia ai mai nisi solitulafono, ma maua ai le filemu sili atu ma mafai ona maua ai le fiafia o le tagata i soo se itu.

E le gata ina moomia lena ituaiga o taiala mo o tatou lava aiga, ae ua tofia foi i tatou i tulaga tatou te tauaveina ai le tiutetauave mo le vaaiga o isi. O se epikopo po o se fesoasoani, o se taitai o se korama a le au perisitua po o se taitai o se ausilali, ua ia te oe le avanoa e faia ai se suiga i olaga o isi. Atonu e i ai nisi e o mai i aiga e le lolotu uma, po o aiga foi e le malolosi i le lotu;

o nisi atonu ua o ese mai o latou matua, ua le amanaia a latou talosaga ma fautuaga. E mafai ona avea i tatou ma tufugaaao i le Alii e faia se suiga po o se eseese i le olaga o se tasi ua i ai lena tulaga. Peitai, a aunoa ma le taiala a lo tatou Tama Faalelagi, e le mafai ona tatou faia mea uma ua tofia i tatou e fai. E maua mai lena fesoasoani i le tatalo.

Sa fesiligia se faamasino lauiloa o Amerika, pe o le a se mea e mafai e i tatou o tagatanuu o atunuu o le lalolagi, ona faia e faaitiitia ai le solitulafono ma le le usiusitai i tula-fono, ma aumaia ai le filemu ma le fiafia i o tatou olaga ma totonu o o tatou atunuu. Sa tali mai o ia ma le faaeteete, "Ou te fautuaina le toe foi i le faiga tuai o le faia o tatalo po o lotu faaleaiga."

I le avea ai o i tatou o se nuu, pe tatou te le faafetai ea aua o loo avea pea le tatalo faaleaiga ma aga o loo tatou faia pea? E i ai se uiga moni o i tua atu o se muagagana masani e faapea, "O le aiga e tatalo faatasi e mau faatasi foi."

O le Alii lava Ia na poloaiina i tatou ina ia faia tatalo faaleaiga ina ua Ia fetalai mai, "Ia tatalo i o outou aiga i le Tama i lo'u igoa, ina ia manuia a outou ava, ma a outou fanau" (3 Nifae 18:21).

I le avea ai o i tatou ma matua, o faiaoga, ma ni taitai i soo se itu lava, e le mafai ona tatou taumafai e faia lenei malaga matautia i le olaga nei, e aunoa ma le fesoasoani faalelagi e lagona ai i tatou i le taialaina o i latou o i lalo o la tatou vaaiga.

A faia a tatou tatalo faaleaiga ma a tatou tatalo taitoatasi i le Atua, ia tatou faia ma le faatuatua ma le faalagolago ia te Ia.

Laa i Luga e Auauna Atu

Ina ia avea ma a tatou faaitaiga, tatou liliu atu i le soifuaga o le Alii. Sa pei o se moliuila susulu o le agalelei, le soifuaga o Iesu a o galue auauna o Ia i tagata. Sa Ia aumaia le malosi i vae o e pipili, o le malamalama i mata o e tauaso, faalogo i e tutuli, ma le ola i le tino ua oti.

O loo aoao mai i Ana faataoto Lona mana. O le faataoto i le Samaria agalelei, sa Ia aoao mai ai, "Ia e alofa atu i le lua te tuaoi" (tagai Luka 10:30–35.) O lona agalelei i le fafine sa molia atu i le mulilua, sa Ia aoao mai ai le malamalama ma le alofa (tagai Ioane 8:3–11). I Lana faataoto e uiga i taleni, sa Ia aoao mai ai i tatou ina ia faaleleia i tatou lava ma taumafai ina ia atoatoa

(tagai Mataio 25:14–30). Pe Na te lei saunia ea i tatou mo a tatou matafaioi i le fausiaina o se aiga e faavavau.

O i tatou taitoatasi—pe o se taitai perisitua po o se taitai i se faalapopotoga o se ausilali—ua tali atu i lona valaauga paia. Ua uma ona vae-tofia i tatou mo le galuega ua tofia i ai i tatou. I le Mataupu Faavae ma Feagaiga e 107:99, o loo fetalai mai ai le Alii, “O lea, ia taitoatasi ai le tagata ma aoaina lana tiute, ma galue i le tofi ua tofia ai o ia, i le ma’elega atoa-toa.” A o tatou taumafai e fesoasoani ina ia manuia ma malolosi i latou tatou te vaaia i o tatou tofiga i le Ekalesia, o le mea moni lava, o le a tatou faamanuiaina ma faamalolusia o latou aiga. O le mea lea, o le galuega po o le tautua o loo tatou faia i o tatou aiga ma o tatou tofiga i le Ekalesia, e mafai ona faavavau o latou taunuuga.

I le tele o tausaga ua mavae, a o aveva au ma se epikopo i se uarota tele o tagata eseese, i le Aai o Sate Leki, ma e silia ma le afe tagata, sa ou feagai ai ma le anoanoai o luitau.

I le aoauli o se tasi Aso Sa, sa telefoni mai ai le pule o se faleoloa e i tuaoi o la matou uarota. Sa ia faamatala mai o le taeao lena, sa alu atu ai se alii talavou i lona faleoloa ma faatau mai ai se aisakulimi ma se faguinu. Sa ia totogiina lana faatau i se tupe mai se teutusi, ma sa alu o ia, ae galo ai le teutusi [i le faleoloa]. Ina ua maua se avanoa o le pule e tilotilo ai i ai, sa ia iloa ai o se teutusi o le taulaga anapogi ma o loo lolomi ai le igoa ma le telefoni a la matou uarota. A o faamatala mai e ia ia te au le tamaitiiti sa i ai i le faleoloa, sa vave ona ou iloina le alii—o se

tiakono talavou mai la matou uarota, e sau mai se aiga e le malolosi i le lotu.

Sa muamua ona oso mai lo’u te’i ma lo’u le fiafia, pe a manatu pe mafai faapefea e se tasi o a matou tiakono ona ave le tupe o le taulaga anapogi o loo faamoemoe mo i latou e manaomia [le fesoasoani], ma alu i se faleoloa i le Aso Sa ma fai ai sana faatau. Sa tonu ia te au ou te asiasi i le tamaitiiti i lena afaifi, ina ia aoao o ia e uiga i tupe paia a le Ekalesia, ma lona tiute o se tiakono e aoina mai ma pui-pui na tupe.

A o alu atu la’u taavale i le fale o le tiakono lea ma lona aiga, sa faia sa’u tatalo le leoa mo se taitaiga, i a’u tala e fai ina ia ta’u atu ai le mea ua tupu. Sa ou taunuu ma tuitui le faitotoa. Sa tatala mai e le tina o le tamaitiiti, ma sa ia valaaulia a’u i totonu o le potu malolo. E ui lava ina tau le iloa se mea i totonu o le potu, ae sa mafai ona ou iloa le laitiiti tele ma le tulaga faaletonu o i ai. O nai meaafale sa i ai, ua aliali mai filo. Sa matua foliga le lava le tina.

Sa mou ese atu lo’u le fiafia sa i ai i lena taeao ona o le mea na fai e lana tama, ina ua ou iloina o se aiga ua matua manaomia lava se fesoasoani. Sa musuia au e fesili atu i le tina pe o i ai ni meaai i le fale. Sa ia ta’u mai ma loimata, e leai se mea. Sa ia fai mai, ua fai si leva ona le toe faigaluega lona toalua ma ua matua manaomia lava e i latou e le gata o meaai, ae faapea foi se tupe e totogi ai le lisi o le fale, ina ia aua ai ne’i tutulieseina mai si o latou tamai fale.

Ou te lei ta’ua lava le mataupu e

uiga i le tupe o le taulaga anapogi, aua sa ou iloina atonu sa matua fiafiava le tamaitiiti ina ua tu i le faleoloa. Sa vave ona ou faia se fuafuaga mo se fesoasoani mo le aiga, ina ia maua a latou mea e ‘ai ma so latou malutaga. E le gata i



O le tautua po o le auunaga tatou te faia i o tatou aiga ma o tatou valaauga i le Ekalesia, e mafai ona i ai taunuuga faavavau.

lea, sa fesoasoani foi taitai perisitua i le uarota, ma sa matou maua ai se galuega mo le tane ina ia mafai ai ona ia saunia mea e manaomia e lona aiga i le lumanai.

O le aveva ai o i tatou ma taitai perisitua ma taitai i ausilali, ua ia i tatou le aia tatau e maua ai le fesoasoani mai le Alii mo le faalauteleina ma le faataunuaina o o tatou valaauga ma tiutetauave. Saili atu mo Lana fesoasoani, ma a oo ina e maua ia musumusuga, ia e faatinoina loa i luga o lena musumusuga pe o fea e te alu i ai, pe o ai e vaai, pe o le a le tala e fai, ma pe faapefea foi ona ta’u atu. E mafai ona tatou fefulifulisa’i faafia se manatu i o tatou mafaufau, ae seiloga lava tatou te faatinoina lena manatu,

ona mafai lea ona tatou faamanuiaina olaga o tagata.

Ia avea i tatou ma leoleo mamoe faamaoni mo i latou o i la tatou vaaiga. Sa tusia e John Milton i lana solo, o le “Lycidas,” “Ua tilotilo a’e mamoe fiaaai ae le fafagaina” (laina 125). O le Alii lava Ia na fetalai atu i le perofeta o Esekielu, “Oi talofa i leoleo mamoe o Isaraelu . . . ua le fafaga i le lafu” (Esekielu 34:2–3).

O lo tatou tiutetauave le vaaia ma fafaga le lafu, aua e ao ona sailia mai nei mamoe faapelepele, ma nei tamai mamoe mu’amu’a i soo se mea—i fale o o tatou lava aiga, o fale o o tatou aiga lautele, ma o loo faatalitali mai mo i tatou i o tatou valaauga i le Ekalesia. O Iesu o lo tatou Faaa’oa’o. Na fetalai o Ia, “O a’u nei o le leoleo mamoe lelei; ua ou iloa a’u mamoe” (Ioane 10:14). E i ai so tatou tiutetauave o ni leoleo mamoe. Ina taitasi ia i tatou ma laa i luga e auauna atu.

Aapa atu e laveai mai.

I le malaga i le ala o le olaga, e i ai tagata ua pagatia. O nisi ua o ese mai faailoga o le auala lea e tau atu i le ola faavavau, ma ua faatoa iloa ai o le auala ‘alo lea sa filifilia, e gata. O le faaususili, faatamala, ma le manatu faapito, ma le agasala, e i ai lo latou aafiaga faatama’i i le soifua o tagata. E i ai i latou, ona o ni mafuaaga e le mafaamatalaina, e ese le pa’o o le talipalau e fia savavali ai, ae o latou iloa ane mulimuli o le Ili Fagufagu o le faanoanoa ma le mapuitiga lea la sa latou mulimuli ai

I le 1995 sa tusitusia e le Au

Peresitene Sili i latou sa o ese mai le lafu a Keriso, ma tuu i ai se faaupuga faapitoa e faaulutala faapea, “O Se Valaaulia e Fo’i Mai.” O loo i ai i le savali le talosaga lenei:

“Ia te outou ua i fafo o le li’o o le Ekalesia tusa lava pe o le a le mafuaaga, matou te fai atu, fo’i mai. Matou te valaaulia outou ina ia toe foi mai ma taumamafa i le fafia sa outou iloa muamua. O le a outou vaaia le tele o lima mafola e faafeiloai ia te outou, ma fesoasoani atu ia te outou, ma



avatu ia te outou le mafanafana.

“E manaomia e le Ekalesia lou malosi, alofa, lotonuu, ma le faamaoni. Ua uma ona faalelei le ala, ma ua mautinoa o le ala lea e mafai ona toe foi mai ai se tagata i faamanuiaga atoatoa o le avea ai ma tagata o le Ekalesia, ma ua matou faatalitali atu e talia outou uma e mananao e foi mai.”

Atonu o se vaaiga e masani ai o le a e taulalata mai ai i le fale i lou avanoa patino e te aapa atu ai ma laveai mai. Se’i o tatou tilotilo i se aiga e i ai se atalii e igoa ia Siaki. Mai lava i le

amataga o le olaga atoa o Siaki, e tele lava a la feupuaiga matuia ma lona tama. I se tasi aso, ina ua sefulufitu ona tausaga, sa matua ogaoga sa la tauupuga. Sa fai atu Siaki i lona tama, “Ua lava lea. O le a ou alu, ma ou te le toe foi mai lava!” Sa alu o ia i lona potu ma teu lana ato. Sa aioi atu lona tina e nofo, ae sa le mafai ona faalogo ona o lona ita tele. Sa alu o ia ae tutu ai lona tina ma tagi i le faitotoa.

A o tuua e ia le lotoa, toetiiti i oo atu i le faitotoa, ae faalogo atu o valaau mai lona tama ia te ia, “Siaki, ou te iloa o le tele o le mafuaaga o lou alu ese, e pau ia te au. O lea ou te matua faamalie atu ai lava.

Ou te manao ina ia e iloa afai e i ai se taimi e te toe fia foi mai ai, e talia lava oe.

Ma o le a ou taumafai ia avea a’u o se tama ua sili atu mo oe.

Ou te manao ia e iloa, ou te alofa ia te oe, ma o le a ou alofa pea lava ia te oe.”

E leai se tala a Siaki ae sa alu i le fale faatali pasi, ma totogi lona pasese e malaga ai i se mea mamao. A o nofo o ia i le pasi ma matau maila ua te’a, sa toe foi lona mafaufau i upu a lona tama. Sa amata ona ia iloa le tele o le lototoa, le tele o le alofa sa manaomia e lona tama e ta’u mai ai tala sa ia valaau mai ai. Ua faatoese mai lona Tama. Sa ia toe valaauliaina o ia e foi atu, ma ua tagitagi ai pea i le ea o le taumafanafana ia upu, “Ou te alofa ia te oe.”

Sa iloa e Siaki, o le isi taga e sosoo ai, o ia. Sa ia iloa e na o le pau le ala e mafai ona ia maua ai le filemu mo ia lava, o le faatino lea i lona tama o le ituaiga mafaufau matua lava lea e tasi, o le lelei, ma le alofa sa faali atu e



Ia avea i tatou ma leoleo mamoe faamaoni mo i latou o i la tatou vaaigna.

Iona Tama ia te ia. Sa oso ese Siaki mai le pasi. Sa toe totogi lona pasese e toe foi mai ai ma amata loa lana malaga i le fale.

Sa taunu o ia a ua te'a laitiiti le vaeluaga o le po, ma sa ulufale atu i le fale, ma ki le moli. O loo nofo mai ai lona tama i le nofoa faalue, ma lona ulu o loo punou. Ina ua pupula a'e i luga ma iloa atu Siaki, sa tu a'e o ia mai le nofoa; ma sa faataalise ona taufai opo mai e le tasi le isi. Sa ta'ua mulimuli ane e Siaki e faapea, "O na tausaga mulimuli sa ou i ai i le fale, o tausaga aupito fiafia na o lo'u olaga."

O se tamā lenei, sa faamutaina faamalosi ona lagona ma faagutu lona faamaualuga, ae aapa atu e laveai mai lona atalii a o le'i oo ina avea ma se tasi o le anoano o "fu'a leiloloa" ona o aiga ua afaina ma malepepe. O le alofa, o le noataga mau lea, ma le pulupasama faamalolo; o le alofa e

tele taimi e lagona ai, ae seasea ona faaalua.

Mai le Mauga o Sinai o loo taalililili mai ai i o tatou taliga, "Ia e ava i lou tama ma lou tina" (Esoto 20:12), ma mulimuli ane, mai le Atua lava lea e tasi, le poloaiga, "Ia outou nonofo faatasi i le fealofani" (MFF 42:45).

Mulimuli i le Atatusi Auiliili a le Alii

Tootuli i lalo e tatalo. Laa i luga e auauna atu. Aapa atu e laveai mai. O nei mea taitasi o se itulau taua lea o le atatusi auiliili a le Atua, e fau ai se fale o se aiga, ma avea ai se aiga o se lagi.

O le paleni o le ki lea mo i tatou i o tatou tiutetauave paia i o tatou aiga ma o tatou valaauga i le Ekalesia. E tatau ona tatou faaaogaina le poto, o musumusuga, ma le faautautaga, a o vaaia ma tausaga o tatou aiga ma faataunu o tatou tofiga i le Ekalesia, aua e tofu taua tele ia mea taitasi. E le

mafai ona tatou tuulafoa'ia o tatou aiga; e le tatau foi ona tatou tuulafoa'ia o tatou tofiga i le Ekalesia.

Ia tatou fausia ma le tomai, aua nei faaaogaina ni auala 'alo, ae mulimuli i Lana atatusi auiliili. Ona fetalai mai lea o le Alii, o lo tatou asiasi fale, ia i tatou, e pei ona Ia fetalai atu ia Solomona, o se tufuga foi o se isi vai-tau, "Ua ou faapaia lenei fale ua e faia e tuu ai lo'u igoa e faavavau; e faasaga i ai o'u mata ma lo'u loto i aso uma" (1 Tūpu 9:3). Ona maua ai lea o o tatou aiga faalelagi ma aiga e faavavau, ma o le a mafai foi ona tatou fesoasoani, ia malolosi ma manuia ai foi isi aiga.

Ou te tatalo ai ma le lotomaulalo tele ma le faamaoni ina ia tofu maua e i tatou uma lenei faamanuiaga. I le suafa o Iesu Keriso, amene.

FAAMATALAGA

1. Tusi a le Au Peresitene Sili, 11 Fep. 1999; tagai *Liabona*, Tes. 1999, 1.

O SE FOLAFOLAGA I LE LALOLAGI

O LE AU PERESITENE SILI MA LE AUFONO A LE AU APOSETOLO E TOASEFULULUA
O LE EKALLESIA A IESU KERISO O LE AU PAIA O ASO E GATA AI

O I MATOU, O LE AU PERESITENE SILI ma le Aufono a le Au Aposetolo e Toasefululua O Le Ekalesia A Iesu Keriso O Le Au Paia O Aso E Gata Ai, matou te ta'utino atu ma le faamaoni, o le faaipopoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Lē Fofoa, mo le taunuuga e faavavau o Lana fanau.

O TAGATA SOIFUA UMA - tane ma le fafine - ua foafoaina i le faatusa o le Atua. O i latou taitoatasi o se atalii po o se afafine faaleagaga faapelepele a ni matua faalelagi ma, o lea ua tofu ai i latou taitoatasi ma se natura ma se taunuuga paia. O le tulaga tane po o le fafine (o le tagata,) o se vaega taua lea o le mua'i olaga, olaga faitino, ma lona faamoemoe e faavavau.

I LE MUAI OLAGA, sa iloa ma tapua'i atalii ma afafine faaleagaga i le Atua o lo latou Tama e Faavavau, ma sa [latou] talia Lana fuafuaga e mafai ai e Lana fanau ona maua ni tino faaletino ma le tomai faalelalolagi latou te maua ai le atoatoaga ma iloa tino ai lona taunuuga paia o se suli o le ola e faavavau. O le fuafuaga paia o le fiafia, ua mafai ai ona faaaauu fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau.

O LE ULUAI POLOAIGA na tuuina e le Atua ia Atamu ma Eva, e faatatau i lo la agavaa mo tulaga faamātua, o se tane ma se ava. Matou te ta'utino atu o le poloaiga a le Atua i Lana fanau ia fanafanau ma ululuola ai le lalolagi, ua faamalosalia ma faatumauiina. Matou te toe ta'utino atu foi ua poloai mai le Atua, o mana paia o le foafoaina o fanau, ua na o le va lava o le alii ma le tamaitai ua faaipopoina faaletulafono, o se tane ma le ava, e tatau ona faaogaina ai.

MATOU TE TA'UTINO ATU o le ala ua foafoaina ai le ola faitino, ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.

O LE TANE MA LE AVA ua i ai le tiutetauave paia e alofa ma tausii e le tasi le isi ma a la fanau. 'O fanau

o le tofi lea mai le Alii' (Salamo 127:3). Ua i ai i matua se tiute paia e tausii a latou fanau i le alofa ma le amiotonu, ia tuuina atu i ai mea e manaomia i le faaleagaga ma le faaletino, ia aoao i latou e alofa ma feauaunaa'i, ia tausii poloaiga a le Atua ma avea ma tagatanuu usiusitai i tulafono i soo se mea e nonofo ai. O tane ma ava - tina ma tamā - o le a latou tali atu i le Atua mo le faataunuuna o nei mea e ao ona faia.

O LE AIGA ua faauuina e le Atua. O le faaipopoga i le va o le alii ma le tamaitai e taua i Lana fuafuaga e faavavau. E tatau ona fanauina fanau i totonu o feagaiga o le faaipopoga, ma ia tausii e se tamā se tina o ē ua faamamaluina ma le faatuatua atoatoa feagaiga faalelulugalii. E maua le fiafia i le olaga faaleaiga pe a faavae i aoaoga a le Alii o Iesu Keriso. O faaipopoga ma aiga manuia, e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafiafia tuufaatasi. I le fuafuaga paia, e tatau ona pulefaamalumalu tamā i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo o latou aiga. O le uluai matafaioi a tina o le faafailleina lea o a latou fanau. O nei matafaioi paia, e ao i tamā ma tina ona fesoasoani le tasi i le isi o se paaga tutusa. O mea e faaletonu, oti, po o nisi mea e tula'i mai, e alagātatau ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

MATOU TE LAPATA'I ATU o tagata taitoatasi o ē ua solia feagaiga o le ola mama, o ē faasaunooa i taitoalua po o fanau, o ē ua faatalalē i le faataunuuna o tiutetauave faaleaiga, o le a i ai se aso tou te tutū atu ai e tali atu i luma o le Atua. E le gata i lea, matou te lapata'i atu foi, o le faamalepeina o le aiga o le a aumai ai i tagata taitoatasi, alaafaga, ma malo, faafanoga ia na ulua'i ta'u mai e perofeta ana-mua ma aso nei.

MATOU TE VALAAU ATU i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumauiina ma faamalosalia le aiga o se iunite faavae o malo.

O LE EKALEZIA A
IESU KERISO
O LE AU PAIA O ASO
E GATA AI

